

Txirritola

ARAMAIO / Barikua / 2003ko martxoaren 21a / 58. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

KZGunea zabalduko dute maiatzean kultura etxean

UBANE MADERA


Maiatzaren erdialdetik aurrera KZGunea izango da Aramaion, gainerako herri gehienetan moduan. Zortzi ordenagailu izango ditu, guztiak Internetera konektatuta. Izan ere, KZGunearen helburua da aramaioarrek Internet erabiltzea. Horretarako, erabiltzen erakusteko eskolak emango dituzte.

Eusko Jaurlaritzatik bideratutako proiektua da KZGunea. Esan bezala, ahalik eta jende gehienak Internet erabiltzen ikasteko eta erabiltzeko. Hortaz, edozeinek parte hartu ahal izango du KZGunean emango dituzten ikastarotetan, baina bereziki, etxeoandreei, erretiratuei, langabeei, etorkinei eta ikasleei zuzenduta dago; betiere, 18 urtetik gorakak badira. Kontua da jende talde

horiek direla Internet erabiltzeko erraztasun txikiagoak dituztenak.

Horrela, KZGunean egingo duten lehenengo gauza Internet erabiltzen erakusteko eskolak ematea izango da. Bi hilabetez ibiliko dira eskolak ematen, egunero pare bat orduz. Eta horretarako zortzi ordenagailu ipiniko dituzte. Baita monitorea ere. Behin eskolak bukatutakoan, hiru ordenagailu geratuko dira Aramaio-ko KZGunean, jendeak egunero erabil ditzan; adibidez, norberaren posta elektronikoa begiratzeko. Eta monitorea edo begiralea egongo da, jendeari laguntzeko. KZGunearen erabiltzaile izateko izena eman beharra dago. Behin izena emanda, pertsona horrek Euskal Herriko edozein KZGune erabili ahal izango du. Edozelan ere, Aramaioa oraindik ez dira iritsi izena emateko orriak. Iritsi bezain laster jakinaraziko dizuegu.

Kultura etxean ipiniko dute KZGunea, liburutegiaren ondoan. Maiatzaren erdialde inguruan zabaltzeko asmoa dute, guztia gertu egonez gero. KZGunearen zerbitzu guztiak doan izango dira.



UBANE MADERA

Sexua, indarkeria... erakusten dituzten guneak debekatuta egongo dira KZGunean.

Margo erakusketa eta salmenta eta kontzertua

Anboto tabernakoek ez dute ez atsedeenik hartzen, eta oraingo asteburuan kontzertua antolatuta dute.

Oraingo honetan bihar, zapatua, izango da, musika taldeak ezin duelako barikuan jo. Hain justu ere, Once Varas izeneko taldeak jardungo du, 22:30ean. Gasteiztik datorren laukotea da, eta, bereziki, rumba estiloko musika egiten du. Azaroan diskoa grabatu zuten, eta, batez ere hori aurkeztuko dute Anboto tabernan.

ERAKUSKETA


Eta ez hori bakarrik. Artelanak ikusteko aukera eskaintzen dute Anboto tabernan. Orain, Juan González Cuesta margolari bergararrak egindako lanak daude ikusgai; eta gura duenarendako, baita salgai ere. Batez ere, pai-

saien eta natura hilen margo-lanak aukeratu ditu bergararrak Aramaion erakusteko. Guztira zortzi lan ipini ditu.

Orain dela 12 urte hasi zen margotzen Juan González Cuesta. Ordutik hona, besteak beste, Bergaran margo lehiaketa irabazi du. Eta erakusketa dezente egin ditu, bai Bergaran baita Arrasaten ere.


HURRENGOAN BESTE BAT

Martxoaren bukaerara arte izango da bergararraren erakusketa Anboton. Gero, apirillean erakusketa aldatu egingo dute eta beste norbaiti emango diote aukera hori. Hain justu, hori da eta Anboto tabernakoen helburua: jeneralean aukerarik ez duenari bere lanak erakusteko aukera ematea.



UBANE MADERA

Bereziki, paisaiak eta natura hilak daude ikusgai Anboto tabernan.



Gazteen abesbatza jendea pozik

Nagusien taldeaz gain, gazteen abesbatza ere sortu da herrian; joan den astean eman genizuen horren berri, eta orain, taldea bera aurkeztuko dugu. Oraindik ez du izenik; hori bai, Papargorri berbari bueltak ematen dabilta. Barikuetan elkartzeko dira, kultura etxean. Eta esan beharra dago oso giro polita sortu dela taldean. Joan den asteko elkarrizketan erakutsi genuen irakaslea bera ere ez dela edozelakoa. Hortaz, ekimen interesgarria izan daiteke herriko gazteendako. Interesa dutenak (OHoko 4. mailatik gora) kultura etxean ager daitezela, barikuan, 19:00etan.

LABUR

Lizarrak sartuko dituzte Zuhaitz Egunean

Gogoratu beharra dago datorren astean izango dela Zuhaitz Eguna Aramaion. Hain justu, eguaztenean ospatuko dute, hilaren 26an. Hain moduan, San Kristobal moduan, joango dira, eta hain zuzen eskuetan hartu eta 30 bat minutu landatuko dituzte.

San Martin Eskolako 4. mailak sartuko dituzte zuhaitzak; 6 eta 12 urte bitarteko umeek, hain zuzen ere.

Zuhaitz Egunaren helburua, besteak beste, gure zuhaitzen bizi iraupena ziurtatzea da; bereziki, gero eta urriagoak diren zuhaitzena; kasu honetan, lizarrena.

TELEFONO JAKINGARRIAK

OSASUNA / LARRIALDIK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuiako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutako da, eta autobusa erabili gura badute, bezperan deitu behar dute honako zenbaki honetara: 629 54 59 23

OHARRAK

'EGUNKARIA'-REN ALDE
Euskal Herriko Mendi Federazioak egindako deiarekin bat eginez, Besaidera mendi-irteera izango da Aramaiotik etzi, domeka. *Euskaldunon Egunkaria*-ren aldeko mendi irteera da, mendizaleen eta mendi-taldeen atxikimendua eta elkartasuna erakusteko. Hitzordua 12:00etan da, Besaideko zelaietan. Han ekitaldi xume bat egin, eta salda eta jatekoa emango diete parte-hartzaileei. Aramaiotik 10:00etan irteerako asmoa dute antolatzailleek, Orixol elkartekoek. Parte hartu gura duenak plazan agertu besterik ez du.

OSOKO BILKURA

Datorren eguaztanean martxoko osoko bilkura egingo dute. Landuko dituzten gaien artean, kontu hartzaile berria aurkeztuko dute; 36ko gerran fusilatutako gaineko mozioa landuko dute; zenbait dirulaguntza eskatzea aztertuko dute, baita sahararrak ekartzea ere.

ZINEMA


Jimmy Neutrón: el niño inventor filma emango dute.

KIROLA

Datozen hiru hilabeteotarako kantzaren erabilera zozketatuko dute

Datorren eguenean, hilak 27, kiroldegiko kantxa erabiltzeko zozketa egingo dute, 19:30ean, kiroldegiko kafetegian. Hortaz, kantxa erabili gura dutenak joan behar dira batzar horretara. Hori bai, herriko kirol taldeek eta multi-kirola egiten dutenek ez dute zozketan parte hartuko, euren dako kantxa orduak urte osorako hartuta dituzte-eta. Apirilera, maiatzerako eta ekainerako kantxa-orduak zozketatuko dituzte. Astean orduak erabiltzeko. Prezioak kantzaren erabileraren arabera dira. Adibidez, kantxa erdi hartuz gero, Aramaiokoek 3,75 euro ordaindu behar dituzte eta kanpokoek, 4,40 euro. Eta kantxa osoa hartuz gero, Aramaiokoek 5 euro ordaindu behar dituzte eta kanpokoek, 9,40 euro. Horrez gain, argia eta dutxak aparte ordaindu behar dira.

Pilotan, areto futboleko, saskibaloian, eskubaloian eta boleiboleko egiteko aukera dago



KIROLETAKO EMAITZAK

Areto futboleko eta paleta txapelketetako asteroko emaitzak

Joan den asteko emaitzen kontrakoak ekarri dituzte oraingoan areto futboleko taldeek. Gazteen taldeak 1-5 galdu zuen Izarra Gorriren kontra; kadete mailako mutilek 13-3 galdu zuten Baro-Caloren kontra; eta neskek 4-2 galdu zuten Jesus Obreroren kontra.

Oraingo asteburuan, bihar, zapatua, jokatuko dituzte partidu guztiak. Gazte mailakoek 11:15ean dute hitzordua, Aguraingo kiroldegian, Oriamendi Lezaoren kontra; kadeteek 10:30ean dute partidua Jesus Obreroren kontra; eta neskek 11:30ean, Atletiko Santa Mariaren kontra.

Paleta Txapelketari dagokionez, Pérez-Urra bikoteak 35-32 irabazi zion Barandiaran I.a-Oianguren bikoteari eta Arriolabengoa I.a-Azurmendik 35-34 irabazi zioten Garaita-Flores bikoteari. Domekan jokatuko dituzte hurrengo partiduak (bikote berek); lehenengoa 09:00etan izango da eta bestea, 10:00etan.

BOTE PRONTOAN / Exabier Fernández Hormaetxe · Mondragon Unibertsitateko ikaslea

“Egiteko ohitura hartzea da garrantzitsua; eginez gero igartzen da, bestela pilatzen doa dena”


Zornotzarra da oraingo aste-ko gure berba-laguna. Exabier Fernández Hormaetxe du izena eta Aramaioko udal-tertxean praktikak egiten dabil. Otsailaren erdialdean hasi zen eta maiatzera-ekainera arte segituko du jardunean:

Zelan etorri zara Aramaiora?
5S izeneko proiektua egitera (garbiketa eta ordena).

Zer da hori?
Kalitatea lortzeko tresna bat. 5S deitzen da; bost berba japoniarren siglak dira S horiek. Ez dakit japonieraz zer esan gura duten S horiek, baina euskaraz honela esango genuke: aukeraketa-antolakuntza, estandarizazioa, garbiketa, ordena eta diziplina. Baina *diziplina* berba apurtxo bat militarra da, eta guk *ohitura* esaten diogu.

Hortaz, praktiketan-edo zaude Aramaion?

Proiektu labur bat egiten nabil. Hori egin ostean ikasten segituko dut, ikasketen goi maila egiteko: Ingeniaritza, Mondragon Unibertsitatean. **Zer egin behar duzu 5S horiek ezartzea lortzeko?** Pertsona bakoitzarekin egoten naiz. Orain lehenengo atalean gaude: aukeraketa eta antolaketan egiten. Zerk balio duen eta



“Kalitatea lortzeko tresna da ‘5S’. Bost berba japoniarren siglak dira ‘S’ horiek”

zer bota behar den ikusten gabiltza, apur bat antolatzen. Eta, horretarako pertsona bakoitzarekin egon behar dut, zer erabiltzen duen ikusteko, materiala sailkatzeko... Orain, hemen, biltegian nago, zer den baliokoa eta zer ez aukeratzeko, hain zuzen ere.

Hortaz, ez zabilta udaletxeko bulegoetan bakarrik?

Udaletxean eta biltegietan nabil. Dena dela, udaletxean lan egitea gaitzagoa da; izan ere, biltegi baten segituan ikusten da zer dagoen soberan eta zer ez; udaletxean paper asko urtetan gorde egin behar izaten dira...

Zure lanaren emaitzek eragina izango dute Udalak ematen duen zerbitzuan?

Biltegietan-eta ez; baina Udalean akaso bai. 5S sistema udaletxe barruko langileendako

da; hortaz, eurak hobeto badabilta, kanpoan ere igarriko dute. Adibidez, zerbait bilatzen hasi eta azkarrago aurkituko dute 5S sistema ezarritako gero.

Enpresa askotan ezartzen dute horrelakorik?

Bai, Mondragon Taldean barruko enpresa guztietan ezartzen dabilta. Eta bestelako enpresa motetan ez dakit. Askotan, adibidez, ez dute horrelakorik ezartzeko astirik.

Baina, zure iritziz, inportantea da horrelako zerbait egitea?

Nire iritziz bai. Jeneralean enpresetan egiten da, ez Udaletan. Baina hemengo alkatea enpresa baten dabil lanean, eta han 5S sistema erabiltzen dutelako ekarri du hona.

Nork bere bizimoduan ere ezar lezake horrelako sistemarik? Eman egiguzu gomendioaren bat...

Gaitza da. Nik, adibidez, etxean logela hankaz gora daukat. (Barreak). Egiteko ohitura hartzea da garrantzitsua. Normalean eginez gero, igartzen da. Sekula ez bada egiten, pilatzen eta pilatzen doa dena. **Aramaion gustura zabilta?** Bai, bai, gustura nabil hemen. Herri polita da.

“Udaletxe barruko langileendako da; eurak hobeto badabilta, kanpoan ere igarriko dute”